



**Sud Bosne i Hercegovine
Sud Bosne i Hecegovine**

**Broj: S1 3 Iž 037878 20 Iž
Sarajevo, 22.10.2020. godine**

Sud Bosne i Hercegovine u Sarajevu, u apelacionom vijeću sastavljenom od sudija Vesne Trifunović, predsjednice vijeća, Srete Crnjaka i Dinke Bešlagić Čovrk, članova vijeća, odlučujući o žalbi žalitelja Vasiljević Dragoljuba, Kesterenlaan 7, Breda, 4822 WL Breda, Holandija, izjavljenoj protiv Odluke Centralne izborne komisije Bosne i Hercegovine broj 05-1-07-1-998/18 od 1.10.2020. godine o odbijanju upisa u izvod iz Centralnog biračkog spiska za glasanje van BiH za Lokalne izbore 2020.godine, u nejavnoj sjednici, održanoj dana 22.10.2020. godine, donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje van BiH za Lokalne izbore 2020. godine za ukupno 27.960 birača po prijavama podnesenim do 1.9.2020. godine, zbog neispunjavanja uslova iz odredbi člana 3.15 stav 1., 2. i 3. Izbornog zakona BiH, među kojima se nalazi i žalitelj.

Protiv ove odluke žalitelj je blagovremeno uložio žalbu u kojoj navodi da je utvrdio da se ne nalazi na spisku glasača za glasanje putem pošte jer je prijavljen na više adresa, te ističe da će dostaviti dodatnu dokumentaciju u cilju ostvarivanja svog biračkog prava.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbaci kao nedopuštena, odnosno odbije kao neosnovana.

Ispitujući ožalbenu odluku u okviru žalbenih navoda vijeće je zaključilo da žalba nije osnovana.

Prema stanju u spisu ovo vijeće konstatuje da je CIK BiH, prije donošenja ožalbene odluke, a prilikom razmatranja prijava dostavljenih za žalitelja, utvrdio da su za žalitelja dostavljene dvije prijave na PRP-1 i na PRP-2 Obrascu - Prijava za glasanje

izvan BiH, te da su u prijavama navedene različite adrese na koje će biti upućen glasački materijal. U prvoj prijavi je navedena adresa: Starčevića put 163/2 B, 32103 Ljubici-Čačak, Srbija, dok je u drugoj prijavi navedena adresa: Kesterenlaan 7, 4822 WL, Breda, Holandija.

S obzirom na ovakvo činjenično stanje, po shvatanju suda, pravilan je zaključak CIK BiH da se druga zaprimljena prijava na ime žalitelja ne može smatrati obaviješću o promjeni adrese u smislu člana 3.16 stav 1. Izbornog zakona BiH, s obzirom da žalitelj podnošenjem druge prijave nije ukazao na postojanje prve prijave, niti je dostavio traženu potvrdu o prebivalištu/boravištu u inostranstvu.

Iz navedenih razloga CIK BiH nije bila u mogućnosti utvrditi koja je od podnesenih prijava vjerodostojna, što je žalitelj bio dužan dokazati u smislu odredbe člana 3.15 stav 1. i 7. Izbornog zakona BiH, a što je isti propustio učiniti u postupku ocjene vjerodostojnosti podnesene prijave.

Sve navedeno ukazuje da se radi o zloupotrebi biračkog prava odnosno prava na glasanje iz inostranstva, te je pobijana odluka CIK BiH, pravilna i zakonita i njom se sankcioniše pokušaj zloupotrebe navedenog prava.

Izrada izvoda iz Centralnog biračkog spiska za birače koji glasaju van BiH prema odredbi člana 3.6 stav 4. Izbornog zakona BiH, vrši se na osnovu podataka koje ima Centralna izborna komisija BiH i podataka koje dostavljaju građani koji glasaju van BiH. Tek ako ispuni sve propisane uslove iz stava 1., 2. i 3. člana 3.15 Izbornog zakona BiH, podnosilac prijave se može naći na izvodu iz Centralnog biračkog spiska za glasanje van BiH.

U predmetnom slučaju žalitelj ni u naknadnom roku nije dostavio potvrdu o prebivalištu/boravištu – odnosno podatke o tačnoj adresi u inostranstvu u smislu odredbe člana 3.15 Izbornog zakona BiH, zbog čega nisu ispunjeni uslovi da se u smislu člana 3.15 stav 6. Izbornog zakona BiH nađe na izvodu iz Centralnog biračkog spiska.

Pobijanom odlukom žalitelju nije oduzeto biračko pravo jer će na dan Lokalnih izbora 2020. godine moći glasati na redovnom biračkom mjestu u opštini prebivališta.

Iz navedenih razloga Apelaciono vijeće ovog suda nalazi da je pobijana odluka Centralne izborne komisije Bosne i Hercegovine pravilna i zakonita a žalba neosnovana, pa je istu primjenom odredbe člana 81. stav 1. Zakona o upravnim sporovima Bosne i Hercegovine („Službeni glasnik BiH“ broj 19/02 do 74/10) valjalo odbiti.

**PREDSJEDNICA VIJEĆA
SUDIJA**

Vesna Trifunović